

摘藻堂四庫全書薈要

集部

欽定四庫全書薈要

集部

懷麓堂集卷

五十五  
五十二

詳校官候補通政司經歷臣郭祚熾



欽定四庫全書薈要卷一萬六千六百七十九

集部

懷麓堂集卷五十

明 李東陽 撰

稿三十

誌銘

明故朝列大夫雲南布政司左叅議致仕呂公  
墓誌銘

公姓呂氏諱昇字明遠世爲襄陽人祖諱義永樂初累

功擢徽州衛副千戶贈明威將軍錦衣衛指揮僉事祖

妣孫贈恭人考諱貴嗣千戶有寵英宗朝起擢錦衣衛

指揮僉事後調貴州平越衛以功遷指揮同知階懷遠

將軍懷遠公四子公年最長幼嗜學遊京庠從禮部侍

郎刑簡翰林編修劉公昇受易學舉順天壬午鄉貢連

得甲申進士第觀政吏部成化丙戌受戶部主事有勤

慎聲庚寅疏乞省懷遠公於平越間歲乃反壬辰懷遠

公卒率諸弟往歸其喪服闋遷員外郎丁酉運舟不時

至命公往督官士奉令罔敢後己亥遷郎中會朝廷用  
師建州出督運餉餉不告乏辛丑竟典王府冊封副使  
癸卯擢雲南布政司左叅議至則躬親郡縣察隱除弊  
有武官怙勢殺人執法者欲貫之公曰死者何辜竟抵  
法民翕然稱快蒲蠻亂奉檄宣恩德皆帖服不敢肆公  
巡不擇地衝冒瘴毒因獲疾瀕殆乃起丙午入賀聖節  
事竣遂乞致仕弘治戊申十二月四日疾作遽卒年五  
十七嫡母王封恭人生母李及配楊以公貴累封宜人

子二某年日葬嗚呼子與公同庠同舉鄉貢及進士凡三十年聞政譽籍甚顧於詩未甚悉也比卧病公携五言數首過予使訂可否予見其帖有法度及詢之則曰吾業此二十年誦唐詩千首每袖置一卷有遺忘輒取繹之今尚能誦焉所作五七言亦無慮千首然未始示人聞子論甚強予意後數日當盡携以來過期不至忽報云死矣因取所畱稿閱之慘然以悲又數日公弟錦衣千戶昂奉同年通政魯公克明狀以銘請予因以語

昂俾輯遺稿俟異時次而傳之而先畀以銘銘曰生不  
溺貴當力學以成旋棄其羸以保此令名胡取之難而  
委之也輕乃以其餘自託於詩欲以是鳴志弗竟而止  
實傷我情有欲知公不於其詩其考我銘

明故監察御史張君墓誌銘

監察御史張君世用按福建時得疾還京師屢輟屢作  
猶力疾出治事今年春益劇乃具疏乞歸事下吏部未  
覆而君卒成化乙巳閏四月二十九日也年四十有九

君屬纊時謂其子立曰吾親年七十吾不及終養以死死不恨獨歎此耳又謂其中表弟尚寶卿仲君惟馨屬所以識其葬者蓋謂予予往弔君聞遺言而哀之翌日奉君同年中書舍人楊君應寧狀來請銘予以維馨故識君久且得應寧狀可據信銘不得辭君姓張氏諱稷字世用世爲揚之寶應人曾祖諱谷成祖仲仁父彥明封太常寺博士母鄭氏封孺人君少有器識弱冠爲縣學生穎脫儕類御史見其文驚曰是當爲場屋魁比試



有司屢弗利成化戊子始卒鄉貢壬辰登進士第觀政  
戶部嘗預收京儲給河南潼關諸軍賞皆有能聲授太  
常博士凡值郊祀廟饗左右執事閑禮度有白金文綺  
之賜居數年被簡爲四川道御史監光祿寺出納明慎  
及按福建樹風采嚴號令鋤強植弱敏於聽訟直判曲  
直然未嘗恃以爲能每錄重辟必勤服念所全活者甚  
衆有藩閩武臣怙勢爲民病君列其罪奏疏之名益彰  
尤重文教以作人厲俗爲事間又訪先賢遺跡興廢補

敝存問其子若孫或弔古感物輒形歌詠亦不以妨政  
務及受代簿牘無畱者時官數多冗至有冒名匿罪以  
干祿澤君率同官極論之詔黜其尤者若干人君後別  
有擬奏而病已作竟不果上云君閭爽明達博交汎愛  
而臧否自別有不當意輒見辭色旋亦消釋不復着胸  
臆間憫窮赴急義氣所激視財利若土苴在官十餘年  
不問生業未嘗增寸土一屋服器儉朴蕭然如諸生時  
君當經術授徒京師有顯者爲詩文清拔有思致至於

辨別體裁評騭高下尤介介不苟君子以爲知言所著  
有竹西稿若干卷娶許氏戶部檢校文誠之女封孺人  
一子某月某日葬某山之原銘曰入其堂其氣奮以揚  
接其人其論激以昂忽弗振而死能無傷乎

封承德郎刑部主事譚公墓誌銘

封刑部主事上海譚公自作壽藏於黃龍浦之西原又  
自制棺槨衾襚凡後事皆備會其子員外郎詔歸自官  
公日引至其地左右指曰墓穴當主何山墓門當何鄉地

當置何樹池畜何魚田所宜種者何穀園所藝者何物  
詔唯唯退而泣曰噫此殆以後事屬我也還朝而訃及  
公諱甫字廷禮世居上海鶴涉里年十六失怙出贅朱  
氏數歲乃歸養肄禮經舉子業志游庠校不果府強辟  
爲從事非其好也乃以經學授厥子曰必爲我成之間  
家居置塾爲鄉子弟師多所器就及謁選丞居野裁剗  
綜合見稱爲才以外艱返載修塾教并繼母弟侃諤皆  
誨使成業焉納婦置產居之兄章裕死遺孤訓誨若已

出潘氏妹老無子迓歸養之改丞陽信專督馬馬政簡  
裕不爲力坐謗辭官詔舉鄉貢禮部試連得捷公曰吾  
不歸治家俾詔或內顧遷業豈至是哉於是益屏世營  
厭耳喧襍居浦西別墅築周垣鑿方池構屋數楹環蒔  
花竹日吟諷游行以此自老及聞詔拜官昭以四戒謂  
急失情緩則留獄刻則妨平恕多疑則長奸僞因韻爲  
詩使誦之詔子魁兒早夭公貽書曰非我不德則汝失  
刑是致不可不省詔勘獄高郵時法禁殊肅公又示以

書云王事至重母得在道歸歸必請又一年乃用詔例以省覲歸三晦朔亟趣使行然中實不釋疾且作詔遷今秩公力疾手書致戒蓋自是不復至矣或者謂公曠達遺世樂不諱死此世所不易或曰久於命殆安之爾彼戒子者意懇懇不釋斃然後已此豈遺世者哉君子曰後說益知公者公魯祖伯玉祖文政考克閨配某氏子二詔其長也次子誥舉懷才未仕孫男女各二皆幼公年六十有二某日葬詔之舉於鄉予得其文魁選間

及在官廉慎精法律以公命奉姑養於官即所稱潘氏  
妹者也詔以刑部郎中陳君一夔狀請銘一夔公鄉人  
有世好言蓋可據故爲銘銘曰名弗身遂於子則取之  
公不曰矜曰我國有之生距有窮意過斯止公不外慕  
曰此足以死死有遺憂其憂在國曰吾子有職於我是  
塞彼官弗忒以耀於潛德

封太孺人楊母熊氏墓誌銘

楊太孺人熊氏卒於新都其子行人司正春奔喪歸既

闢地卜日具葬其孫翰林侍講廷和請予銘按楊氏之

先本楚人元末徙新都春之曾祖諱賢贄於李祖諱壽

山考贈行人司正公諱玫皆冒李姓公三娶始郭繼楊

太孺人以同邑望族實再繼焉時楊氏中落公爲縣學

生有前室二子遠政太孺人撫若已出及公膺貢入國

學畱居故廬手自織辟畜鷄豚易錢穀爲朝夕費裁取

自給餘悉致京師爲旅資公授永州吏目太孺人從歲

所得祿俸務節縮一錢不妄費公卒於官遠政亦相繼



天死春及二季皆幼未堪事太孺人蓬骨垢面負遺骸

挈兩寡婦以歸值貴州苗作亂道甚梗晨夜間行出入

營壘觸冒瘴癘雖造次頃刻區別臧獲咸有分限每經一堡必號曰天乎未亡人經某堡矣經一嶺必曰經某

嶺矣以至城郭津渡皆然既抵家治葬家復貧如未仕時

脫所被簪珥遣春就學始令復楊姓曰汝父治命也目嘗失明成化辛丑春舉進士疏乞歸省太孺人喜乃復明居數年趣春就任曰我尚健猶幸及汝之封也春拜

行人司正以弘治辛亥滿三載吏部上最績獲賜勅命  
贈公如其官太孺人始受封乃具冠帔拜祠堂曰未亡  
人有以見君地下矣某月日卒壽八十有三某月日葬  
於某山之原在公墓右數武許子五孫十廷和某某曾  
孫五銘必有狀司正君既歸追憶懿行懼外之人無能  
知勉自爲狀其辭哀而理廷和年十二舉鄉貢其舉進  
士實先司正君今在講筵史局卓然有聞焉予嘗叙貞  
壽堂詩以徵太孺人之教與澤然所叙事差簡茲叙爲

銘作乃書之加詳若公行尚多以銘爲太孺人作故不及且與詩叙互見云銘曰有沃斯原我樹我封夫君所安我不圖存後四十年而窆於鄰異壙同垣疇其保之以遺我子孫

明故中憲大夫浙江處州府知府郭君廷臣墓誌銘

予聞浙藩張布政稱良有司得知處州府郭君廷臣及彭刑部南巡最君績移檄獎厲處人相與建生祠奉之

未幾君卒其子鄉貢士郭方以憂居肥鄉馳省君至杭  
得訃奔至處處人曰我侯之子也相嚮而哭郭既返君  
喪道鎮江奉楊按察應寧狀上京師請予銘蓋其母之  
葬予實銘之矣郭君舉成化己丑進士官戶部爲主事  
督收京儲會計精當尋督天津諸衛及汗石諸場財賦  
宿弊盡空屬吏以金餽斥弗納遷員外郎督儲臨清見  
伐桑棗貨食者畀之米且諭之曰植物不易貨且盡當  
復何貨民感悟遂不復伐會有議開邊者願君督餉辭

不獲比出境不遇賊而還進郎中有宗室訟民田久不  
決君往勘實歸奏稱旨因疏所見數事於朝及知處州  
守久闕倅貳更署吏緣爲姦君至嚴防禁籍記條教事  
無畱案尤精判決人不敢欺處有銀冶民乘利據險爲  
恒患君榜示禍福弗悛者輒捕除之嘗有羣盜久弗獲  
君憂而禱之是夜夢衛廩穀溢因廉得米廣者爲盜窟  
併獲贓證衆以爲神麗水民惑後妻逐前室子君重傷  
子教反覆開悟俾爲父子如初戒民節用禁胥吏勿下

鄉井還逋民萬餘口復舊業歲旱禱雨雨輒應有蟲傷  
禾稼爲文祭之三日而死有瑞蓮嘉禾諸物或以頌君  
辭焉尤留意學校躬爲程課士皆勸學獨嚴御下貪官  
黷吏皆斂不敢肆惠歸於民民以是思之君少用志教  
養弟息舉鄉貢懋惠皆習舉子嘗旅宿比舍有女夜奔  
拒之不去乃出避之其素所操執固如此豫策民利數  
十事及爲郡次第行之處人輯所立教條曰爲政紀綱  
曰括蒼規約以傳其所自述有詩文若干卷郭氏本出

鹿邑國初魯祖仁美從大兵北行至肥鄉因家焉祖晟  
龍江衛經歷父謙永年縣丞累封戶部員外郎今年八  
十矣母石氏累贈宜人君生某月日卒於某月日年五  
十有二娶梁氏累封宜人先卒葬其原己酉某月某日  
合窆郭其嫡子也側室楚氏有子郇丁氏有遺腹子郭  
告諸祠堂名之曰邢銘曰世有毀譽或非厥情面背則  
殊矧惟死生浙有郡侯郭姓忠名蒞郡六年而棄其氓  
氓忘我侯侯我父兄劬孰我佚擾孰我寧泣以送之有

淚吞聲侯也何知我情是嬰侯生有祠匪悅與營曷以  
驗之於侯之門有考績者視我茲銘

需菴處士岳公墓誌銘

亡妻岳宜人之伯父需菴處士公諱端字元方實爲吾  
外舅蒙泉翁季方之母兄卒且葬公子坪泣曰吾父之  
銘尚將誰屬哉東陽亦拭淚曰吾又奚辭因檢翁所撰  
述得公世系詢諸戚黨老長及坪所自述又追憶吾妻  
言得公事行并叙次之岳氏世爲順天鄆縣人曾祖諱



德甫祖諱思銘考諱興懷遠將軍府軍前衛指揮同知  
妣太淑人劉氏懷遠公始娶焉繼娶王劉娶於南京宣  
廟詢公家命舟迎至京師賜第居之懷遠公職秘甚近  
勸不顧私公孝友識理道少勤幹裕遠遊江湖服養成  
業翁賴以就學懷遠公從翁爲翰林編修嘗具疏論國  
大事辭甚激公窺見其稿泣且裂曰安所置老母乎及  
翁入內閣論曹石罪惡得禍戍萬里外私第爲世家所  
奪家盡破公則曰弟職然也未嘗色怨獨奉母日慰悅

之終其身迨勢家敗公具自列憲廟命還故第翁出知興化公獨居慨慕及見致政歸方聚處數年而翁卒遺業蕭然幸公老壽家賴以不墜遇王氏所生弟千戶詳從弟海皆極友愛育從子培均增堂埴垣不異已出培子標再嗣官及諸孫及格植之立羣從中表諸女弟之嫁皆公力也族叔有餉邊者解所衣以贈之劉氏舅卒為買棺治殮乃歸白懷遠公旁近姍黨下至旅寓以貧告為治奩買棺者多不可紀數劉氏從母無子迎居母

事三十年竟歿而葬之女適王主事證早寡撫育其女  
擇貢士任經嫁之於今有孫焉家居不妄費不服紈綺  
雖老病躬課臧獲或手操箕箒不少倦自制棺椁厭輿  
凡後事曰死命也吾俟其正而已弘治丁酉四月三日  
病忽革匡坐而絕得壽七十九五月某日葬滬之望村  
先墓配南京陸氏有賢行子坪克家孫梁女孫一人益  
自增堂之失我蒙翁遂失嗣續且不壽以沒天下共悼  
惜之公後卒十有八年壽踰二紀有子及孫視翁福祉

殆若過之其功在繼續方居顯揚亦畧稱矣然則公之  
重以翁而亦可以無負也夫銘曰方以類聚習以性成  
古語則然於公有徵遠則畿甸尊則公卿孰不曰此蒙  
翁先生之兄也漢有陳氏元季並稱公與蒙翁將無忝  
厥名有嗣在公來者其承之

西莊處士羅君墓誌銘

西莊羅公建昌南城人處士也其子玘爲翰林編修故  
大夫士多知公例得封勅不及命以卒鄉之人不敢字

公故以號著曰西莊云公諱昌字文程生未晬失恃乳弗給日啜肉數嚙得不死竟以是得疾家人易之公考獨曰是將強吾宗顧以疾弗督使學一日公忽自奮從季父大觀學博涉史經地志歷法諸書雖未通然恒若以自負者人亦莫能測也正統間賊鄧茂七作亂聲言襲建昌城中人罔有固志公帥衆守西門不脫介胄示以固守力懲弛怠敲朴日不絕麾下士無敢仰視者忽流言將黥鄉兵軍中皆驚公叱曰敢譁者死衆乃定冠

亦漸引去皆謝曰活我者羅公也村北芙蓉山傳有金  
鷄神能禍福人趨者踵接公曰寧有是敵以下皆答而  
返之竟以無他嘗夜過東麓見灌莽中鬼燐匝地比曉  
揮百斧楮之遂屋其上今家焉其意氣屹屹不苟爲物  
變類此尤敦內行事父一日不離側祀事父益虔自撰  
墓奠禮曰此禮非古吾以勸孝也晚居西莊置產增業  
爲遊眺所亭臺竹樹甲旁邑諸墅日與客笑傲其間竟  
以是終所著有西莊稿家塾稿若干卷娶傅氏子男四

綱紀經維紀改名玘以國子生舉京闈第一登進士第  
拜今官公壽六十九某月某日葬縣之某原按羅氏出  
侍御史袍袍避危全諷跋扈徙居南城十一傳爲曾大  
父慶遠生蘭谿司稅俊傑俊傑生耕隱處士大矩實生  
公至公子玘乃復顯方其未顯也公謂之曰爾有奇才  
終必稱吾志比久詘言不爲變已而果然玘舉京闈予  
實校其文故以公葬請予銘其同官陳正之有狀銘曰  
鬱而崛其氣有勃斂其鍔弗剛以缺斨以發亦莫我敢

過固天將成之匪予奪

國子生傅君墓誌銘

國子生清苑傅君卒於家時其子編修珪方闋母服再入翰林纔數月以冬至節謁陵未入見而訃至將復歸予甚傷之越數日珪奉檢討毛維之狀來請銘且曰吾母已得體齋傅先生銘吾父時以爲慰茲吾父不遇以沒先生倘予之銘是慰吾父地下蓋珪之舉於鄉予暨體齋典試事故其言云然予安可辭也哉按傅氏本清



苑舊族族最大鄉稱所居地曰傅家莊曾祖諱士成祖

諱貴皆弗仕考諱信爲嵩縣主簿有去思於民君諱泰  
字顯雅弱冠遊保定府學爲生通詩經學成同業皆推  
孫稱後進遂屈爲子弟執經問疑義者相繼君教法嚴  
整凡及門經指授多稱爲才君自負甚偉始謂科第可  
立取也試京闈連失利失利者類以藉口曰君道科目  
果足恃哉成化己亥膺府貢士上禮部陞國子生又卒  
業歷營繕司事名齒銓籍次未及間乞歸假君曰吾非

不欲仕仕亦有命安能役志於物以累吾志乃自號抑  
莊散人放情田野日與鄉人遊多蓄酒待客客至則詠觴  
爲樂有招者亦忻然赴之性坦亮不喜談人過或犯之  
笑不與辨人以故樂親之知君者謂雖自放然所負故  
在終必自見且其子珪已得進士官侍從即不就仕亦  
嘗荷有錫命是其進退優裕無弗可者而君遽以疾卒  
得年五十有六而已君喜爲詩稿成亦輒棄去不復自  
惜每以教珪不獨於經學爲然珪志業專確將大有就

而君不及見然他日考試業者寧不曰無是父無是子  
如揚子所云者亦可以無憾哉君配劉氏有內行其卒  
也以弘治庚戌葬府城南祖塋君卒以某月日明年某  
月某日啟壙而窆以劉氏祔焉子五珪乃其長孫如子  
之數女孫加女之一皆在室銘之曰士有力學奮爲仕  
徒有車既膏中阨於途塗亦孔夷衆所共趨我行獨遲  
咎豈在車爲疾者驅我車弗如有命我者孰疾孰徐我  
悉聽之弗能覲覲我力弗窮而委其餘勗我繼軌慎哉

厥初

先叔父前金吾左衛百戶李公墓誌銘

我叔父府君病間東陽問之曰有憂乎曰汝在予何憂  
有遺言乎曰汝在予何言嗚呼東陽孱愚賴我叔父以  
有今日自吾父學士府君之喪實父事焉叔父老而無  
子我其敢弗力凡葬事悉稱吾父顧名秩未著不敢以  
銘誌爲達者累謹茹哀輟哭叙其事以藏嗚呼吾李氏  
世出茶陵洪武初吾曾祖繼二府君籍義兵歷濟南衛

改燕山左護衛吾祖允三府君在永樂初與靖難功授  
小旗改金吾左衛尋入內局督工作正統間遘疾當代  
吾父欲棄學從事叔父年十六請行遂以書數受任器  
仗名籍奏牒辭忒心計手錄雖宿吏老掾皆自以爲不  
及然悉力勤事戴星觸霧或遠涉江漢未嘗告勩成化  
初以上洪恩擢所鎮撫久之遷百戶弘治初例罷官而  
冠服供事終其身內領家政一不煩吾父躬所營置必  
以供俯仰費及東陽所得祿俸並聽出納勺粟寸帛兩

無嫌猜四十年餘凡三徙七婚九表賓祭餽贈禮至無  
算經制區析舉無遺憾其有勞於家又如此尤篤孝吾  
祖寢疾久扶掖甚至吾祖母陳宜人疾苦癱與吾父截  
葦筒吸之每談遺舊事至老猶相對泣下事吾母劉宜  
人及今母麻宜人莊不費禮張氏姑貧益甚養其夫子  
孫三世凡婚嫁視財利如土苴親黨中待以舉火者往  
往有之然實無厚積當其揮金赴恙雖夜爨不給弗顧  
也是亦可謂難已初娶唐氏秀朗有內幹久不嗣內焦

馬史三氏每得子輒不育長女唐出者嫁儀真衛指揮  
同知張珏次出焦氏者嫁龍驤右衛副千戶王清皆蚤  
卒又次嫁府軍右衛副千戶張雄又嫁馬氏孤女於燕  
山左衛百戶喬峻叔父生宣德丙午五月二十五日沒  
弘治甲寅三月二十一日壽六十九歲視吾父猶不及  
一馬痛哉吾世墓自曾祖而下葬於城西畏吾村凡冢  
八唐叔母實在穆次四月二十六日東陽帥弟東溟男  
兆先輩治葬事墓去吾父所葬地三里而近東陽質居

禮家謂宜合葬從祖不敢屈祔新城獨念吾父叔兄弟之愛未始違朝夕而窀穸稍遠於情終不安嗚呼痛哉叔父諱澤字行潤不敢諱者爲來世計也

兒兆同埋銘

兒兆同者予第二子太子太傅成國公朱公之外孫也生僅十歲而殤悲夫兒生於成化丙午予隱几東閣夢人抱送一男心訝曰安得至此六月九日以生辰避客入直乃於舊所夢處得先學士公報始悟曰顧不至此



乎予謂其同物且有竒兆也遂名之兆同云兒骨相竒  
聳目炯炯射人機穎驚脫五歲能作屬對語教之即應  
口成誦口占俚句類協聲韻字雖未素識亦能闇寫累  
數十筆不少誤至於篆體亦然予懼其洩露太早每爲  
抑遏之然逸不自制則肆爲諸幻戲剪刻描畫搏埴裝  
貼斂掣結縛百凡之事心得手應無事倣規而天真爛  
然超出意象即物計數毫分兩析皆畧合算法予亦怪  
之然弗能禁也弘治甲寅春兒病頭痛至冬愈劇右臂

既萎猶能以左手貼梅花盈樹蓋自是始不獲作乙卯  
二月五日竟死其母嘗曰兒幼頗肥何漸瘦兒應曰木  
葉向長則展而不積此何怪又自言吾愛朝景花草竟  
發禽蟲下上殊愜人意然不可全得午日一照則萎矣  
嗚呼孰謂斯言爲終身之讖耶兒不擇服食獨自負俠  
伉不下物間有所愛其母曰乞汝翁兒曰便乞無恥竟  
弗乞充其志殆無可以容之者其不克少見頭角以死  
正坐是哉造物者與人往往狎玩侮戲撓其志慮使不

得其平不然有物如此曷不自秘惜徒費其技能而又  
棄之又何益也予既思兒不置謂其有成人之志焉棺  
殮祭葬不忍殤視稍優其數以慰其有知者吾過矣吾  
過矣予以母命卜是月十八日帥其叔容之兄兆先葬  
兒都城西北小西門祔於祖墓之側慟而爲之銘銘曰  
孰夢我以祥孰畀汝以良而止於斯其生奚爲噫吁戲  
孰知我悲

懷麓堂集卷五十

欽定四庫全書薈要卷一萬六千六百八十

集部

懷麓堂集卷五十一

明 李東陽 撰

詩後稿一

古樂府

靳克道少卿所藏杜愬男朝母乳姑二圖請題  
其上為賦古樂府二首

下帷哭穆伯上堂訓文伯不聞民勞逸先問土肥瘠妾

可織母可績爾食爾祿我服我力保我家祀成爾德朝  
朝朝母得母憐一朝責子令子賢文伯賢穆伯祀敬姜  
之名名不死靳家此母復此子杜郎作圖如作史

右朝母篇

母乳兒兒無齒尚可飴婦乳姑姑無齒亦可舖兒本姑  
所生一氣通吸呼水有報本獺林有返哺烏人可以不  
如鳥乎靳姑老生覲朝笋暮復魚千年乳姑意理一事  
則殊母有兒姑有婦昔見崔山南今聞靳京口

右乳姑曲

猫相乳行

監察御史四明陸君美之仲兄文享素友誼與君美少相依文享每同堂而食撫其諸子恩義篤至而外無間言嘗各畜一猫猫各產三子皆銜至堂中乳之每一猫出一猫必為代乳若一無間然者人以為友愛所感君美既貴感其兄之義請記其事於予予非韓昌黎氏無能為說

因為樂府作相乳行俾其鄉之人歌之以傳於  
無窮

猫相乳據如許但知母子息不復我與汝猫相乳世希  
有但食乳哺甘不知誰是母陸家兄弟本同胞提孩孛  
稚相為勞和氣感動成薰陶吁嗟乎人生胡不如此猫  
示用兒效玉川子作

夜坐苦不樂作詩示用兒用兒爾何來來自東南陞自  
言廣西人州縣已忘遺但知姓李氏世業本巫醫家有



三頭牛有田可耘耔當年貴州蠻作亂勞王師夜聞狼  
兵到勢若虎與貌我爺被殺死血肉交淋漓我娘亦被  
賊存亡未可期官師簡少俊閣割隨俘累用兒年十三  
廣額身疋羸生來左目翳幸免殘膚肌紅船載白粳驛  
遠來京畿兵曹奏名籍給配在有司臣愚本無功恩與  
公侯齊用兒亦何物御筆蒙親批彤廷頓首謝髻外歸  
提携煮羹為女食縫帛為女衣役不忍汝勞過不忍汝  
笞居遣用兒侍行令用兒隨殷勤語子姪慎勿凌虐為

丁寧戒僮僕疾病相扶持緬想先皇德欲報何能追賜  
生尚必畜况此非豚雞今皇兩僮賜本出思恩夷岑梁  
年十一吳也二歲差渠視汝為兄汝可弟視之班於若  
鴻鴈戲弄吹塌箎渠小不足責汝長教所宜用兒爾來  
前訓女好言詞清晨早必起日暮眠當遲操畚掃廳堂  
汲水澆園畦客來俸茶菓客去收書棋有口莫吃酒酒  
醉死路岐有手莫做賊做賊送頭皮人生無貴賤但問  
所從誰長為官人奴勝作獍與黎用兒爾誠駭告汝汝

不知垂頭睡莫對吾自吟吾詩

慈母圖

孟氏

將上堂聲必揚夫戒雖嚴不如母訓長惟禮有經家有  
網惟母所愛情可忘生不逮父義有方君不見斷機之  
教何其剛

孝子圖

大兒視母如視父兒罪當笞母當恕小兒視母如視兄  
往復展轉難為情卧層冰得雙鯉兒身雖勞母心喜亦

知慈孝同一理惟人有心天有耳君不見大兒官貴為  
三公小兒肩嗣傳江東江東侍兒為劇戲滿堂坐客皆  
垂淚

長短句

鐵拄杖行

國初廬陵諸老好奇者持鐵拄杖採詩林谷麟  
原王子讓先生蓋其傳也我希蘧府君時以流  
寓選往其間子讓諸孫雲南按察副使世賞能

道其事因託物寄興以著通家之義云

江西水中一枝鐵磨光成精錯成節江頭詞客採詩還  
拄徧淡雲與山月吾宗遺老詩家流杖藜來自湖南州  
道逢此物兩叩擊鏗金戛玉聲相酬鐵精化龍入江去  
回首溪山但烟霧文章逸史見諸孫指點當年採詩處  
杖兮杖兮物雖去矣名猶存青毡豈獨王家門願君節  
比杖兮心比鐵善保六尺千金身

靈壽杖歌

吾聞武當之山四萬二千丈半在天根半地上不知三

十六宮何處稱絕竒產出靈株非一狀蛟螭蟠拏露頭  
角熊經樹顛虎山脚根盤節錯相糾纏含風飽雪經炎  
寒九年洪水之水浸不殺十日之日暴烈何其乾梯懸  
磴接跬步不可上誰采青壁紅琅玕見之羨者不容口  
錫以嘉名曰靈壽瓜之不行者有聲金可同堅石同  
久吾家此物舊所有神與相扶鬼為守自從病足跛曳  
不得前已覺山林落吾手一病經旬不出門此杖手中

嗟猶存下牀歌側立不定此時托子以為命不顧四體  
無微疴但願謝病歸山阿左扶右策夾以二童子下可  
涉園徑上可凌坡陀願載萬本截萬杖窮崖陰谷生森  
羅靈兮壽兮此物倘可致宜遣四海赤子頭雙皓

華山圖歌為喬太常寺作

嗟哉此山吾不知其幾千丈兮但見巍然屹立乎天中  
中有三峯聳拔而直上部位離立西南東諸峯羅列在  
其下有似老長隨兒童縱令立表以識不得美雖有記

里之鼓難為功我聞上古之世開鴻濛沙水盪汨相結  
融融者為泥滓結者為石為山峯石堅山積理亦爾試  
看崛拔斬削別有造化之神工山名五嶽此其一特出  
似異衡與嵩天門重重隔烟霧鐵鎖緣崖引長路摳衣  
欲進苦不前十步行時九回顧山腰流泉如瀑布仙掌  
撐空若承露虎踞龍蟠各有形鸞騫鶴舞紛無數置身  
中峯頂極目乾坤莽迴互秦關蜀徼阨塞豈足論遙指  
扶桑最高樹噫吁噫自有天地今即有此山萬物代謝



今山巋然古人今人到者相接踵誰復騁步窮其巔我  
生好古厭塵俗險絕獨慕昌黎韓昔年南遊復東眺二  
嶽咫尺不一攀有客西來說我以大觀歌聲上徹秦雲  
端畫圖指點向空廓已覺天上非人間喬生喬生如此  
好竒者世不可以多得安得與子遍歷千巔岿

寄題惠山第二泉

江神夜泣山林嘯帝遣神工鑿山竅飛流出地聲灑空  
泉水下與中泠通江邊老翁不知姓手著茶經親鑒定

金山之外更無泉坐令匡廬瀑布空高懸地官侍郎竇

國心似水平生品泉如品士國賢在許州似云江水不嘗作品士亭

同清此山自得青金精世傳泉以錫故清尋山浚泉發清瀉元

是江南好奇者山高水絕詩亦奇鳴金噴玉無停時我

山曾過泉不酌夢枕峻嶒漱澆潏我歌泉和兩知音吁

嗟乎誰哉更識泉齋心國賢嘗號泉齋

懷麓堂集卷五十一

欽定四庫全書薈要卷一萬六千六百八十一

集部

懷麓堂集卷五十二

明 李東陽 撰

詩後稿二

五言古詩

尼山春曉圖

濛濛尼山雲忽忽天向曉  
依微遠峯露拖沓層城繞  
每日山漸高浮光動林表  
環看萬家村俯視一飛鳥  
上公

圭裳胄興與巖谷杳丹青得形似指點入幽渺回首岱  
宗巔誰云衆山小

習隱二十首

卜築城西廬寒暑十五更西軒闢新圃遠若居荆衡踈  
林見秋色爽籟聞空庭園蕪綠復遍屐印旋已平習隱  
漸成癖誰當戀冠纓靜言念疇昔鬢髮白幾莖素志豈  
不高隨時且功名退公得委蛇聊以娛我情

野色澹蕭條城居類林壑閉戶掃荒徑秋葉紛欲落園

亭雜花晚紅碧相間錯采芳意未遲及此霜露薄陶韋  
去世遠古調方寂寞撫景非少年悠然念今昨

岸憤斜陽下踈林開遠山新涼灑衣袂爽氣清容顏林  
端見初月素彩生雲間褰裳步花影欲動悲闌珊向來  
竹林遊覽到已復還寧知一畝內迥若離市闌往事勿  
重道茲盟良亦難浮生且為樂及此一日閒

呶啞復呶啞隔牆聞水車車翻水汨汨如在東陵家當  
軒理嘉樹傍檻移新花一澆潤枯槁再濯無塵沙濟川

恐無用學圃良非差房山有南畝海子餘西涯安得謝  
簪纓悠悠送年華

坐久羣動息秋蟲亦不鳴開軒向空碧華月來前楹炎  
歎飈已盡涼氣飄衿纓萬慮逐霧釋虛懷隨白生可與  
語者誰心口兩無聲古道日荒落浮雲非我情何當脫  
塵鞅及此筋力輕著書畢歲月敢為後世名

羣芳應候歇衆鳥知時歸物理固如此消息乘化機林  
下無一人反遭釋子譏多言亦安用志士決振衣振衣

果何時我髮半未絲無為大自恕今是昨已非山林在  
城市豈必嚴陵磯習隱須及今不習終成違

白日到南陸陰盡陽始生古人重茲候閉關旅不行登  
臺望朝雲窺管占昏星此事久寥落但知物枯榮端居  
默無語俯仰獨含情

曉起徧庭白夜來聞雪聲疎林綴冰葉千樹開羣英玲  
瓏透遠日拍塞阻間行如登梁園臺對客停飛觥如經  
山陰道訪爻隨揚舲居然城市間此景何從生退公曰

已暝酒罷還復醒呼童煮雪水坐歌詩脾清慎勿掃我  
雪留以待書燈燈前少年事老夫難為情

一白雪在地再白雪滿枝三白遍林園跬步天路岐虛  
明徹九宇萬類無一錙棲鳥半隱見毛羽振始知空齋  
閉燈火習靜仍深思邊兵與溝瘠焉能免寒飢吾曹肉  
食人飽煖終安禪今晨尚未隱夙夜將何為

種松盆罌內慮為寒所侵移之南廊下幸得辭幽陰寒  
多日色淺弱植恐難任再移入我室我室隘復深風沙



信飄灑霜雪徒蕭森不逐歲時改貞哉君子心西簷有  
薔薇荆棘忽成林曉歌結交行擇友方自今

初陽動浮景嘉木意已榮幽禽失所性入耳皆春聲踏  
青者何人似與韶華爭吾心豈外慕聊以盡吾心池波  
欲蕩漾野馬將遊行端居不出戶遂我觀物情

人皆賀新歲我獨玩芳景茫茫堪輿間此意欣自領天  
機在鳶魚下上方耿耿

崇桃出墻東穠李忽在眼桃李亦何言下有人跡滿借

問跡為誰主人雙屐短門無車馬至客去春不管呼酒  
酌花神花類為一筦賓主各忘言歸期一何緩

芳園景色動春意回枯芟旭日半浮空和風自東來幽  
禽學新喙天籟名相諧點也當此時游歌沂水涯明道  
當此時花柳前川回堯夫當此時吟詩還打乖而我獨  
何人不樂奚為哉古來樂天意每與憂世偕優游無已  
盡及我髮未衰

南湖春草綠西涯春水多年光日荏苒歸興其如何春

歸客未歸微官一行窩舊室幾易主遠道生重波未諧  
卜居願且和滄浪歌

夏日背屋角良久出林杪紅稠綠復暗頓覺炎蒸少長  
空無停雲遙岫有歸鳥公餘脫冠坐暫謝紅塵擾跡類  
居深山心同契清沼多謝褊襪郎長年送昏曉

流連遮踈雨簌簌鳴高樹隨風散長空徃復不知處沾  
衣覺微涼歌枕達清曙閒餘惜花意媚憶登山路農事  
方苦芒傾心且如注

暑雨忽新霽層軒開碧山浮雲避素月夜色明松闕流  
螢遙隱見宛在深林間掃石坐彈絲天風下鳴環瓊樓  
正在望佇立難為攀

直廬日何長退食良亦久斜陽下庭樹暝色稍侵牖棲  
鴉尚飛翻鳴蟲更清瀏市遠不聞喧樓高但翹首誰云  
官事劇餘暇且杯酒試探買山貲囊中猶在否

寒多怨無衣入夏翻苦熱耕夫困田畝行子愁道暘亦  
有窮邊兵被甲如炙鐵如飛無藏林如走不得穴物類

且復然人生安用說吾徒幸安居公事有作輟揮竹引  
虛涼浮瓜嚼殘雪溪行或林卧若與塵務絕吟長素月  
生坐久青烟滅願叫閭闔風西來掃炎孽願為萬間厦  
意與杜陵別四時有定序寒暑非濫設老我功未成優  
游更時節

懷竹

三年不種竹得竹如得玉十日不見竹一日腸九曲初  
聞平安報舊葉舒更綠忽聽歡笑聲新笋抽五六兒童

亦解事知我性無欲平生愛孤淡不厭食無肉憑將垂  
老身醫此未盡俗倉皇欲傾倒愁病相縛束昨夜偶夢  
之清風灑心目呼童汲泉水日夕勤灌沃吾冠晚當掛  
吾髮朝已沐為爾一扶筇披襟散炎燠

台州三憶詩

一憶方石老同時游曲江再憶逸棠翁同舟泝清湘道  
義夙相契情懷安可忘三憶定軒公芝蘭與同芳之子  
得佳蔭詩書披冠裳一朝復棄去謝病歸柴桑遐躅追

二謝箕裘繼諸黃因之發深慨島嶼遙青蒼

送青谿先生之南京吏部四首

昔我青雲交登朝半公輔倪君廊廟姿獨立爭快覩鐘  
鏞在東序法製形貌古扣之聲鏗然鯨海入吞吐蘭苕  
與翡翠信美安足數緬維有司良拔十思得五如君能  
幾人吾儕愧叅伍南曹固云重留亦詎其所願持五色  
線留為山龍補

故都佳麗地舊里詩書門文僖有家學歷世乃彌敦登

堂學士貴踐斗尚書尊簪纓父子繼姓字兒童論文章  
兩京賦雨露三朝恩君今歷南省祿養懷晨昏壯哉顯  
揚志古道諒斯存

與君析經史歷代窮興衰與君論世故指物分妍媸  
君子固絕識開口無停辭啓我茅塞胸植我蓬生資  
中歲各任事匪徒坐談為君言信實用一一如著龜  
嗟予濫密勿獻替真隨時徒懷朴忠志飽食竟何裨  
茲辰別良友失我坐右規修途自發軔逸駕疇能



追

我昔遊南都山川愛清淑中年有遐慕願此託微祿茲  
謀兩不遂歲月同轉轂獵心老猶存龜筮安可卜君行  
果登仙脫屣塵外躅俯仰樊籠間吾身尚羈束登高一  
相送為駐千里目

弘治乙未六月孔廟災送李學士世賢奉詔祭  
告兼柬衍聖公兄弟

素王富道德闕里昭儀刑門墻揭日月象設開丹青秩

祀宗百代椽題閱千齡明時累修葺彩筆輝晶熒鬱攸  
從何來歟忽乘高冥蒼黃失殿宇迤邐連楹庭冕旒中  
典像篆刻先朝銘遺文就剝落餘燼隨飄零尤憐手植  
檜摧折虬龍形茲事昔未有流傳駭觀聽我皇眷東顧  
宵衣坐明廷儒臣輟講讀天語傳丁寧長路浹旬朔嘉  
期過秋丁設位想顏色升階慰神靈染盛備時物薦此  
明德馨兩公哭三日據禮遵麟經往恨憶焦爛新恩濯  
清泠勞君向公言軺車駐晨星金絲閱雅樂俎豆存古

劔此物幸不泯瞻依尚模型聖道一逝川晝夜無時停  
况聞庀工作卜日占堯奠增高若為山去災如脫腥君  
當返嚴命公當謝丹扃從此振文運休風播重溟

答楊太常止酒用陶韻

止酒固佳事但恐不能止劉伶與婦祀竟落談叢裏賦  
詩以為警多事柴桑子一止一起之可憤還可喜止終  
有起時不止何由起痛絕非人情三分亦近理君誠得  
止法能以人視已往辱書戒予此意良厚矣君量本十

分顧以三為淡今我當覆杯非警亦非祀

又

言小可喻大意得貴知止誰云止酒功不在詩篇裏十  
年分三戒此義同邵子大醉復何樂微醺差可喜譬如  
井不波中宵暗濤起又如髮不梳累日復一理萬變紛  
沓來樞機中在已節宣誰使之張弛斯善矣君戒雖有  
涯皇恩止無涖如聞乾飲詔春宴逢郊祀  
兒子兆先送妹之闕里以詩戒之

汝生不離膝十載懷三河矧茲東魯行道路十倍過新  
春積雨霽潞渚揚清波嘉占得歸妹吉禮方為羅丁寧  
送門戒語長意偏多念汝為彼兄綵戲同婆婆趨庭日  
漸遠奈此晨昏何汝妹已解事彼兄志登科自非骨肉  
親欲去還蹉跎孔門欲觀海所得在一蠱殊途要同入  
仰止心相摩平生我未到遺恨西江羅往年冰玉洗馬  
約遊孔林不果  
聖言汝須記堅白在涅槃慎哉道路間僮僕勞為訶處  
身似逃名却饋如操戈衝寒避栗冽歷險防陂陀汝婆

正倚門何以慰汝婆男兒事弧矢有淚休滂沱聊將婉  
變恩故作慷慨歌

畫萱為沈編修壽題

南國有奇花言哉北堂下亭亭霜雪姿攬之不足把芳  
心抱孤直高致謝穠冶永懷君子交年華去如瀉地靈  
得人勝恩露蒙天假寸草識春暉婉變難遽舍修程山  
水隔妙意丹青寫晚色駐潘園嘉名託周雅詩成寄遐  
祝將以娛壽者持此侑家筵餘馨抱杯竿

題淵明歸來圖

種菊南山下種桑長江濱  
逍遙脫物累感激皆天真  
腰折豈為屈所重在辱身  
居然典午世見此羲皇民  
高風迥絕代圖書流千春  
茂先昧幾決令伯傷遄迤

生菜圖

涼露被西原羣韭共秋色  
青松帶微黃紫芥間深碧  
籬瓜復架豆種種成白黑  
柔藤受牽挽美實爭采摘  
餘芳不知名形狀皆可識  
蜻蜒與蛺蝶婉孌相愛惜  
大哉造

化功誰為分動植丹青亦何事摹寫出雕刻先生嗜淡  
齏而復玩文墨官同詠苜蓿地異棲枳棘聖徒為學圃  
物取聊比德君看桃李門盡藉栽培力芹心倘欲獻菜  
色寧辭責感此罷揮毫幽吟坐終夕

牧牛圖

偶觀牧牛圖因談牧牛事寒暄每隨時燥濕復擇地渴  
愛池水清飢憐春草細耕餘暫教閒負重聊免累肱揮  
還應聲指示如解意馴知道路熟狎與童兒戲抱病亟



相醫

闕

雖有制人有愛物仁亦有用物智非無貴賤  
殊心力兩相濟君看牧民法於此得深譬視彼不牛如  
令人發長喟安得天壤間各使民物遂

癸亥除日落一牙追次韓韻示諸生

衰年重調攝食飲藉牙齒齒踈牙亦落此事但向已物  
象榮乃枯氣機行必止終應讓舌柔幸免為唇恥存者  
肉還生落者骨先死憶當將落時疾痛任厲已及其既  
落後如披石墮水石猶在水中地復非水比飄然如着

處竟與風花似人生亦花類計此真誤矣昌黎落六七  
我亦安足紀五十非遠步百步行可指我牙信已衰我  
齒健何時身手將無同齒也聊復爾浮危每自累頓脫  
驚相視歲除甲子窮除舊亦可喜百骸念全歸萬事難  
具美吾當慎其餘告汝二三子

與黃生館

黃生東南來贄我一束書書中多古意實在黃虞初自  
負信卓犖逢人恥次且得此三歎息斯言良起予平生

江海篇我豈眉山蘇爾祖既逝者而翁亦歸歟巖巖方  
石師將與泰嶽如愛之莫汝觀鄙吝何當除

四職圖

靜觀天機間動物各有職或飛可司晨或走可守夕耕  
或可代力摘或可懼賊有知本天性况乃蒙豢食名存  
實或喪息事空受直我田但荒草我屋無全壁遲明誤  
鴈朝外戶翻吠客茲當問喘時未罷防過役憂勞枉夙  
夜展轉成歎息畫師極摹象詩義非諷刺寄言富貴家

此意須諦識

斷機圖

兒出歸亦樂兒學成獨難持  
刀向機杼割愛傷肺肝三  
遷尚可積一斷寧復完由來  
尺寸功視此經緯端千年  
命世才母教永不刊

舉案圖

歡娛無狎思暗昧不廢禮  
平生擇對心持以奉君子  
幸免傷春啼貧賤安足恥  
闕睢本微物託興王化始  
壯哉

五噫歌高風播人耳

剪髮圖

家貧不買酒綵髮同金龜客來母已歡酒至兒不知愛  
有切磋益非徒燕嬉為情知不可再感激在一時清風  
起貧客好事傳芳辭

先府君墓焚新刻手稿感而有述示兆蕃

平生讀父書句讀粗可了殘編半零落一一費探討嗟  
哉手澤存字法有遺稿憶昔當臨時楮墨徹昏曉好古

窮鴻茫蒐竒極幽渺學成不用世祇以慰枯槁殷勤披  
簡勞猶及趨庭早摩挲日幾過倏忽年將老有妙善錫  
刻鐵筆隨指爪經時歷冬夏計日通酉卯編成衆所歎  
藝絕經應少蓼莪比周人薦芟慙屈到西郊霜露降卜  
日嚴拜掃祝告致文詞精神藉焚燎悲風回輕烟橫淚  
灑哀草公家有痕曠塵務多紛擾志養久莫酬子嗟得  
為孝地下誰有知吾兒慧而天顏捐萬本餘裝藏富緗  
縑流傳徧朝野散布盈海嶠書香屬有託夙夜當自保

以茲結構法作室須念考雖無贏金遺世德以為寶

懷麓堂集卷五十二





總校官庶吉士 臣張能照

校對官庶吉士 臣徐如澍

騰錄監生 臣魏 鎔

欽定四庫全書薈要

集部

懷麓堂集卷五十三

四

詳校官侯蘭通政司經歷臣郭祚熾



欽定四庫全書薈要卷一萬六千六百八十二

集部

懷麓堂集卷五十三

明 李東陽 撰

詩後稿三

七言古詩

恭題御書藥方後

文華殿頭風日晴御書和墨雲烟生聖皇灑翰動盈案  
字字盡作蛟龍形瑤笺向日光如拭中有古方三四表

卷冊真從大典傳貽謀遠自文皇出禁廬侍直多名醫  
班聯拜賜當彤墀囊中妙得君臣秘紙尾蒙親姓字題  
承恩捧下黃金闕如揭中天行日月小試人間癘氣消  
深藏夜半紅光發我皇一念通炎皇要開壽域歸平康  
願推萬念及萬物直遣四海同虞唐

赤壁圖為衍聖孔公題

磯頭赤壁當天倚下有山根插江底江風不動江水深  
曾駕扁舟問蘇子憶昔揮毫對酒時俯視塵寰雙脫屣

掀髯一笑萬壑空夜叫蛟鼉泣神鬼江山再到已不識  
異代興亡知更幾吳強魏走了莫聞萬古乾坤如此水  
天遣斯人作勝觀賦成却解驚人耳絕代文章不數公  
諸家圖畫空相似誰將意象入寥廓坐覺天涯來尺咫  
不信人間有卧遊高堂素壁波濤起東莊先生好古客  
謂我作詩如作史三十年前舊品題山高水落依稀是  
老去方懷為國憂少時誤作談兵喜卜居未遂頭已白  
不向東邦定南紀為公後作赤壁歌莫笑風流非賦比

成國公家槐樹歌

東平王家足喬木中有老槐寒更綠拔地能穿千丈雲  
盤空卻蔭三重屋憶昔二王初種時高門駟馬相追隨  
五朝恩露簪纓重四世威聲草木知世間植物因人瑞  
培植根深乃天意向月長留宿鳳巢排霜故作蟠蚪勢  
舞袖飛花遶北堂屯陰列戟森成行壁窻雨過看秋霽  
紗帽風低坐晚涼古來匠石匪廊廟堂中絲竹應同調  
馮氏空傳大樹名王公豈待三槐兆木天老朽舊通家

樹猶如此我堪嗟願公人好樹亦好長共河山閱歲華  
題陶成草蟲圖效李長吉

枝頭野花團小紅碧影間日金玲瓏蜂鬚捲花香入空  
舞蝶欲去回芳風平原織遍青蒙茸涎蝸篆地鳥跡同  
獨蝻怒擲如強弓輕葉暗響驚鳴蛩秋蟬翼薄紅綃重  
殘聲悉入虛無中丹青手奪造化工活潑潑地惺鬆鬆  
世間藻繪難為功江南但識孫草蟲五月五日多織穠  
都人競鬪芳菲叢慎勿持向東城東

韓大冲西成歸樂圖為陳侍郎德卿題

老妻驅騾騾過坂阿嬬騎牛牛力緩丁男負荷前後隨  
長林蒼蒼日將晚山童慣識來時路山下耕田山上住  
耕時愛濕收受晴剛道今年好風雨秋塲滿穀衣成霜  
家鷄正肥村酒香窮年勤苦一朝樂愁散兩眉如解縛  
官租未了仍私逋眼前且復為歡娛古來農事今亦如  
何人畫此西成圖君不見長安脫中軍亂呼荆湖米至  
方市沽此畫此時曾有無



風雲際會圖為木齋閣老題

會稽山頭多白雲  
天風吹作綉縕春  
須臾變化滿川谷  
覓出人間離垢氛  
倏來忽往渾難定  
後逐前驅若相命  
有色皆成五繡文  
何心解與千峯競  
東巖漸隱西巖出  
綠樹青林互蒙密  
浦極光浮水市烟  
天低影漏茅簷日  
風耶雲耶兩不疑  
遙空絕島無窮期  
亦知莊海扶搖地  
不似陶山持贈時  
雲飛上天風為翼  
俯視齊州九烟碧  
去馬來牛不復論  
龍從虎嘯方相得  
畫家畫此興波濃

此興不與山林同願公大旱作霖雨長似今年作歲豐  
王孟端墨竹長卷為孫太常志同題

大常丰采清如玉醉倚閒庭吟翠竹試將水墨為傳神  
貌得此君真面目踈枝衆葉紛瀟灑雨散風稀聲簌簌  
恍聞環珮下層霄忽訝旌旗出深谷九龍山人去已遠  
彭城一派誰當續笑看江南沒骨花嬌紅艷紫皆塵俗  
蔣家三徑今無主零落湘湖纔一幅我王愛竹復愛詩  
擬畫實籥賦淇澳夢魂彷彿無處所不是長沙定安陸

詩成揮手謝春卿莫道燕歌非郢曲

題徐主事廷用所藏畫鶴時徐歸省長沙

江沙翠竹搖森爽老鶴當空墮清響萬里金天閭闔風  
長夜一聲神獨往濯盡紅塵舊羽衣方知碧落無矰網  
飛當雪落更身輕舞向月明應技癢岡頭彩鳳須同調  
世上凡禽空夢想拔地錐看一日成冲霄翮是千年養  
玉珮疑隨子晉笙錦袍合稱王恭氅何人粉墨得此本  
直為山林助高賞詩成剛附鶴南飛歸報青田紫芝長

石城雪樵圖為李侍郎世賢賦

姑蘇城北虞山側石城峻增雪千尺憑高歷險去復還  
獨有前村老樵客踈林落葉聞虛響遠徑荒苔斷行跡  
仄磴危梯幾處通短衣長帽何人識東華一去三十載  
身上塵緇無寸白夢想猶疑伐木聲樓臺不礙看山色  
石田沈翁好事者點染吳縑成粉墨老氣橫隨筆底生  
神交豈恨天涯隔會稽太守多歸興灞水幽人抱詩癖  
有約重烹學士茶為君細掃松間石

與張都憲公實話別長句

烏臺豸史巡江淮漕舟百萬東南來吳粳如山積燕市  
九陌白日紅塵開手題笏記報天子當軒一顧重瞳迴  
天教今歲足豐稔人道此公經濟才文皇廟算恭襄績  
坐遣官軍飽供億年深役重苦不支百孔千瘡誰為塞  
古稱錯節須利器公縱欲辭寧可得蒼顏驚見老風霜  
手妙忽傳轟霹靂羣猜衆闕了不知但惜兵資與民力  
城狐潛踪社鼠走胝足頰肩方一息公來意氣凌雲霄

公去還聞山嶽搖長烟盪空日照地冠蓋滿路隨干旄  
與公臨別話疇昔三十七年魂夢勞公今勲業不自負  
我獨竊祿慚清朝願期晚節共金石莫使青銅空二毛

畫馬二首

健馬奔泉如渴虹活馬洛水如遊龍竦身作勢跳原地  
仰首噴沫生長風倦思滾塵痒磨樹似是馬身逼馬語  
莫將意態問丹青天機正在忘言處

前馬奔騰後馬逐沙苑東來西江曲相遭意氣兩不平

踏盡長堤春草綠  
奚官一騎高如山  
金環玉勒聲珊珊  
會呼羣駿出雲霧  
同立春風十二欄

題劉廷式所藏山水圖時廷式募兵寧夏還復  
任巡撫

賀蘭西來山作屏  
黃河東迴水為城  
層峯入空鳥雀避  
濁浪捲地魚龍驚  
平疇沃野不知數  
圃亦可種田可耕  
大開閫幄集將士  
中有十萬屯邊兵  
中丞昔奉西秦使  
指點山河識形勢  
風日千年古戰場  
冠裳一代今王制

遠道關心夜聽笳高原駐目春停轡時聞狐豕相出沒  
別選貔貅為扞衛祗應身自作長城水色山光為增氣  
繡衣驄馬重遊地蓬矢桑弧少年志他日歸朝檢畫圖  
為子細說防邊事

憶昔行贈黎叅議本端

昔年我在文僖門門前多士如雲屯文僖先生子視我  
我視諸郎猶弟昆登華涉峻豈自致九原再拜先生恩  
郎君年少各已壯置身共在青霄上過眼星霜四十周



大郎出守還歸葬二郎忽作雁孤飛別我欲去情依依  
滇南道路風塵遠楚國經過者舊稀存亡異轍方同調  
一家父子皆金緋關西清白本世德黎本楊姓冰蘖孰謂儒  
生非題詩贈君聲激烈九月京城滿城雪白玉堂中白  
雪歌黃金臺上黃花節衡山峯高湘水冽此時此景真  
奇絕超都歷塊從今始萬里長途非暫蹶努力功名穹  
壤間丈夫自古輕離別

王孟端竹長卷

九龍山翁興豪放手執蜿蜒青竹杖酒酣怒擲江中流  
化作一龍長數丈一龍躍起一龍隨倏忽羣龍駭奔浪  
穿沙觸石連雲霧頭角森森各相向其間小者稱籜龍  
鱗甲蛻盡風神同人道此翁善劇戲造化乃在指掌中  
君不見九龍山翁云何許九龍山上多風雨素壁空堂  
枝影寒夜半無人作龍語

題胡馬圖贈楊都憲應寧

國初以來重戎馬分曹置官牧于野平原極目沙草青

中有長槽連大廈二十四監叅差開數百萬匹聯翩來  
風髻霧鬣起平地一一盡是凌雲才諸番况復開茶市  
玉篆金牌作符契官茶價重番馬肥不遣公家有遺利  
公家利去歸私門地力盡棄天無恩圍人不死死道路  
縱有馬至空名存去年鐵騎聞深入我士雖強馬不給  
破敵摧鋒不要論飛塵絕漠何嗟及聖皇西顧垂宵衣  
都憲承恩入帝畿由來考牧在經濟亦有官兵勞指揮  
極知君命如山重復道公才似泉湧三千駟牝數非多

百萬貔貅氣增勇西番風紀稱師模南郡禮樂歸文儒  
眼前時事有至急馬政雖一非其祖世間萬事無終極  
撫卷為我三嘆息他日功成獻馬圖因公更問平邊策

畫鷹

卑枝詰屈高枝舉小鷹低回大鷹怒殺氣森森動碧寥  
千山落葉紛無數雲霄意槩風霜姿傲睨六合無雄雌  
夢迷東海未歸路興在秋原初下時吁嗟乎巢清羽兮  
元有肉莫遣鷓鴣空側目

王德輝侍郎母壽八十詩時德輝奉使歸省

鑑湖綠水光如黛堂上長眉動光彩侍郎身着錦衣還  
滿眼物華春不改珠冠翠羽高玲瓏輕車緩杖何從容  
北魚南笋味相似越舞燕歌調不同玉堂珍饌黃封酒  
問婆還憶長安否客至猶懷斷髮心老來閒却和熊手  
君家瑯琊忠孝門母今有子復有孫願婆高壽兒亦壽  
重慶堂前春復春

鍾欽禮雲山圖為史都憲天瑞題

江南畫史誰崇門會稽老鍾清且溫圖成長練置急雨  
彩筆滅盡風神存陽岨陰谷半明翳上有烟雲時吐吞  
深林蒼鬱石塊磊野火不斷天無痕當時得意每自許  
傲睨恥受王公尊勾餘拙翁喜墨竹二者異法雖同論  
謂渠畫格自有派房山之子南宮孫手持此圖自東海  
海色尚帶扶桑暎千巖秋聲萬壑樹咫尺不辨東西村  
幽亭野集昔誰子似有賓主無琴樽問之不答若筦爾  
物外別自成乾坤我生愛山復愛竹對此病目開餘昏

君看巖谷最深處好著數箇蒼筤根

長安舊第行壽劉檢討瑞母七十其父用行終  
東山僉事予同年進士也

長安舊屋郎官宅四十年前老賓客同年兄嫂稱通家  
轉頭歡笑成咨嗟東遊齊山西入蜀遙在舊鄉思舊屋  
承家有子安用多還讀父書登父科千金買屋幾易主  
為指當時斷機處太倉稻熟官酒香猶是平生冰蘖腸  
屋長安居酒長醉願母百年復十歲

客有談仲僉事與立賑濟鄉民事聞而義之且嘉其能與立將赴河南韻以為贈客乃費子充贊善也

維揚城中人食人部使北來勞憲臣廣西監司私賑貧問渠元是揚州民身倡義士傾倉困民吾同胞矧吾親監司拯難不愛身手幹疫氣回陽春前行後隨若次鱗但有給與無譏詢彼氓千愁復萬辛喜極不覺號蒼旻患非在寡而在均聖言在耳識已真西江太史來細陳



我忽聽之雙眉顰今年監司朝紫宸問之不答但逡巡  
明朝別我黃河濱我欲往送河無津南軒井法濟鄉鄰  
意以一髮懸千鈞願子演此為經綸監司發軔當茲辰  
為渠重賦車鞿麟

林良聚禽圖為馮御史執之題

枝間草雀聲啁哳江頭浮鴨嘴啞啞誰教乾鵲報新晴  
似道前山泥滑滑日暮欲往行人愁亦有山禽雙白頭  
年芳物性若反覆惟有無情江水流君不見嶺南林郎

舊時筆落墨殘縑渺蕭瑟酒闌風雨罷披圖臺上烏啼  
月東出

題趙子昂射鹿圖

高秋出獵長城下碧眼胡兒騎剗馬弓如月滿箭星流  
已似千山毛血灑馬前逸兔或可脫山下老麋身欲赭  
彼貪但為口腹謀不見巴西放麈者吳興王孫燕薊客  
酒酣興發時潑墨極知紈綺足風流忘却河山限南北  
噫吁戲薛郎未掛天山弓披圖仰面來天風

劉學士家藏贈行詩畫

公諱世衡  
廣陽人

剡藤四尺花如雪詎向都亭贈離別黃扉閣老坐題詩  
薇省仙翁去持節冰顏玉骨兩無瑕平生交誼如此花  
絕勝東閣郎官興不似西湖處士家仙翁老去花猶在  
奕葉書香長不改時看雨露發根芽肯受塵埃蔽光采  
故物爭傳畫有靈相逢莫道花無情剛羨廣平能作賦久  
知光祿喜調羹調羹作賦皆能事解識當年贈時意藻繪  
休憐五色文瓊瑤不傳千金字玉堂學士仙翁孫百年

文獻今猶存要將事業前賢比留與雲仍後代論

張主事潛奉使闕里紀之以詩兼東行聖公

漢家天子臨雍日孔氏雲孫應世出關西俊士東曹郎  
奉使南來馬行疾長安雪後開新霽炫晃山川豁蒙密  
經心道路遠逶迤翹首殿庭高岑嶽百年盛典聞褒卹  
萬古遺經重刪述極知禮樂超唐宋冕十二旒庭八佾  
平生仰止在宮牆真見升堂還入室杏壇絃誦忽三千  
童冠舞雩思六七顏祠孟廟皆吾黨近者數弓遙者駟

會陪圭組導衿裾歸向虛庭拜天秩

題衍聖公所藏畫竹因憶闕里南國之勝故篇  
終及之

高堂四壁歌舞起曼玉鳴金奏清徵摩挲素練往復還  
似有秋風生爪指古來寫竹如寫神倉卒應接皆天真  
想當磅礴向空廓已覺意象超風塵我家舊傍瀟湘住  
滿地青陰不歸去每聞圖畫即江湖長怪西窻隔烟霧  
闕里墻東縣令家名園種竹不種花蹊回徑折入蒙翳

下有泉水無泥沙長流瀲灩穿林響短髮蕭蕭助森爽  
舊路無因縮地看新梢定見參天長孔客南遊興未償  
此時此景故難忘擬刻琅玕三百字為渠題寄墨君堂

夏太常墨竹卷為屠都憲元勳題

太常作畫如作書銀鈎鐵畫交扶踈試將醉筆寫秋色  
便覺紙面開江湖濃陰匝地雲烟濕黑雨灑空翻墨汁  
硯池深夜籜龍飛鱗角向人皆起立玉堂學士觀揮毫  
復道人間有鳳毛中書君頭老不禿元是中書畫中竹

君不見九龍山人王子猷百年書畫餘風流唐臨宋帖  
世已少此畫此書今幾秋

明山草亭為王侍郎民望題時王致仕歸

華容之南洞庭北明山岵嶢倚天碧峯迴路轉高復深  
下有東曹侍郎宅侍郎昔在山中居三間草屋一牀書  
門前花樹歲開落簾際烟雲時卷舒扶筇上山石截薛  
泛舟入湖水空濶醒看庭月挂松梢醉愛江風起蘋末  
朝走燕齊暮入秦竭來關塞隨風塵丹心用盡髮半白

三十八年秋復春亭從別後誰為主山若有情應解語  
別君年久望君歸俯仰乾坤同逆旅南山之樂北山勞  
問君定是何山高有人新向東山去且共相過醉濁醪  
題米元暉雲山圖卷送木齋先生致政歸南

謝君家住東山東山頭雲氣長青葱山人善畫者老鍾

名欽禮橫圖三尺懸堂中予為作歌有古風雲山變幻態

不同吾家有圖圖更工工部筆法如南宮烟毫雨墨淡  
復濃山有萬壘雲千重宛若綠水浮芙蓉林深樹密行



無踪有眼不辨栢與松幽泉隱耳鳴琤琮咫尺似覺香  
爐峯由來畫與書法通外極秀發中藏鋒米船夜半光  
如虹予心愛之手所封幾年什襲隨巾籠公歸別我行  
匆匆持贈不比華陽翁為公撫卷歌雲龍四方上下將  
烏從停雲靄靄雨濛濛遙當海徼瞻方蓬仙舟一去如  
凌空稽山鏡水多兒童復道東山有謝公身為霜雨裨  
天功出岫入岫何從容蒼生之望安可窮吁嗟乎蒼生  
之望安可窮

茅山草亭為餘姚謝生正作

亭在汝仇湖旁去餘姚縣約有五十

餘里

澄湖四面平如鏡湖上一山如鏡柄小亭孤絕冠山巔  
影落虛明波不定朝看海色開羣暝夕愛嵐光閃餘映  
包含萬象入空寥上有鳶飛下魚泳樵徑崎嶇或可通  
漁歌欸乃遙相應中有儒生讀古書誅茆伐木披荒磴  
山疑句曲豈三仙亭比杜陵爭一勝誰遣湖來作汝仇  
莫言墩去非公姓山中無事聊習靜席上有珍方待聘

溪雲澗月供揮灑春鳥秋花入吟咏烟霄意氣江湖興  
鐘鼎山林豈天性從此功名奕代傳茅山合與東山稱  
贈王提學雲鳳

我思古初制文字篆籀之餘散分寄漢魏隋唐作者多  
後來俗學空姿媚昔從小篆得古法降作隸書差自拔  
周蒞楚芟心自甘持以語人如嚼蠟太常喬卿筆清健  
後習隸兮先學篆使節新從晉地回名山古廟書題遍  
栢臺外史蘭亭孫骨力苦硬如松根搜竒索隱極茫昧

斷石遺墨何繽紛旁枝並集不遺力點畫無釋隸與分  
分徑不刻中郎石比篆聊同許氏文聲離韻協皆成帙  
字或孤存或重出自作意匠指良工宛轉銀鈎鐵為筆  
渠年有十今但一從此蒐羅願終畢平生好古心獨勞  
更謝羣疑遠相質栢臺西去書滿車我欲留之三嘆嗟書  
成珍重許寄我先為摩挲老眼花

錢塘江潮圖為喬少卿希大作

錢塘江頭江倒流中有潮聲號萬牛堆銀如山雪如屋

遠有滅沒當空浮千峯將頽樹欲禿海若股栗天吳愁  
來船歡忻勢自下瞬息千里無滯流去船乘危貴得正  
力盡一過且復休躋攀分寸偶失手頃刻下飽黿與鮪  
由來咫尺不自覺遠望不敢凝雙眸客來未到膽已落  
借問同還見浪不何人起笑欲起舞越東老翁搔白頭  
群兒招呼或助叫倏忽過耳風颭颭達士遐觀得竒賞  
七澤五湖同一漚天道虛疑月盈缺世情妄假人恩仇  
復將險巧作戲劇鄉里少年誇善泅潮來潮去亦何意

人間萬事良悠悠我時渡江不相值空對燕客談杭州  
壯懷高興兩莫遂三十五年秋復秋誰將妙思入畫本  
似與造化爭雕鏤酒酣月落不知處夢醒尚作江南遊

題楊妃出遊圖

沉香亭前春日裏海棠睡足風吹起玉驄馱醉出華清  
頭上綠雲嬌不理內人宣索已多時金鑾供奉來何遲  
有誰並轡復顧笑不是秦姨定虢姨階頭奚官執鞚走  
問渠合似安郎否不然那得近前行祇計籠禽隨瘳狗

君不見馬嵬坡下蛾眉愁可憐  
白骨埋荒丘柳絲難綰芳  
魂住應從君王萬里遊

題湖山春曉圖

湖船着水平無痕蓬上使篙蓬下坐  
山光四面錦屏開  
橋影中天綵虹卧輕鴉繞樹拂千點  
老鶴叫空時一箇  
宴客遙將綺席隨遊人不惜青鞋破  
江南風物今餘幾  
看畫題詩兩無那却恐湖山畫不如  
他年自買扁舟過

鷺鷥圖

平湖影動波光滿白鷺絲長羽毛短舞風梳雨未騰寒  
落却蓮衣秋不管引步昂頭高復低凌虛欲舉意還遲  
穿花隔水時隱見花底遊魚知未知崔家池上多秋信  
碧草長天迷遠近何似王維畫裏看水田漠漠青無盡

鷓鴣圖

鷓鴣啼處春江綠日暮淒風吹苦竹相呼相喚不停聲  
萬恨千愁啼未足有時格磔還鉤輶此聲欲斷無時休  
風低不渡三江水竹冷先驚八月秋我家舊在湘南住



猶記曾聞鷓鴣處不似雲安有杜鵑聲聲道不如歸去  
懷郴州竹為何郎中孟春作

郴州形勝天下稀千巖萬壑勞攀躋山高地峻水清駛  
此語吾信韓昌黎何郎少年美文藻直似賞識隨標題  
偶逢燕人作楚語某水某山皆不迷黃岑名山深入雲

霧楚越籓籬此門戶五嶺中分隔雨晴諸峯忽變成朝

暮蘇仙名山恍惚無定所何公名山流傳豈其祖有泉如燕

泉復如潮名泉與月盈虛社來去編磬石磬懸鐘石鐘似有聲

奇形怪狀紛無數吾祖昔聞先此州吾家近住茶溪頭  
扁舟三日不一到空負平生作壯遊

紫林書屋

一林霜樹明如綺落日餘霞半山紫下有茅齋八九椽  
書聲忽送秋風起天宇澄清鴻雁高窻前墜葉時飄蕭  
秀看丹桂天邊發志比青松雪後凋十年擢第登朝省  
幾向山林憶鄉井匣裏雙龍試一鳴空中獨鶴聞聲警  
君不見衡嶽峯頭雲正開洞庭舟上客初回歸時好種琅

玕實管領丹山彩鳳來

七駿圖

誰哉畫此七駿圖風格雖同毛骨殊回頭卧者若有呼  
行者迤邐求其徒聳身並立兩不語意氣雲霄似相許  
間思嗅塵痒磨足進步欲前仍躑躅君看最後一馬驄  
雙瞳耀日尾梳風長驅如山屹不動舉首一顧千羣空  
平原無人青草長隨意西郊自來往一飽能忘雨露恩  
十年未斷風塵想天閑十二雲錦多空驚歲月易蹉跎

試教一日馳千里月窟崑崙奈爾何

漁舟圖

空舟颺颺鳴高樹落葉隨風渡江去晴波淼淼接天遙  
目斷飛鴻無盡處江村漁翁家在船懸罾結網自年年  
船頭老婦引篙立篷底嬌兒抱櫓眠舉罾見魚魚尾活  
滿眼浪花時潑潑烟雲影滅向中流欸乃聲來起天末  
農夫把來商踏車人生無處非生涯每從勞逸殊好惡  
江南無如釣魚樂君不見洞庭湖邊青草多慈恩寺前

生白波濯纓濯足兩不遂誰和滄浪孺子歌

聚禽圖

西塘日落秋波綠兩兩鴛鴦水中浴野鳧似雁忽西東  
落翠棲紅亂人目鳴鳩愛雨鵲愛晴宿者自宿行者行  
惟有白鷗忘世事朝來暮去兩無情

子昂畫馬卷

翰林學士真天人平生書畫皆通神自言少小嗜毫素  
寸紙遍作雲烟痕老來意態盡物理畫馬欲過曹將軍

此圖似出西域種骨法傳奇氣軒聳將身蹴地跼不前  
矯首見人驚欲踊燕家死馬猶堪賣况此風神解飛動  
在野須教一顧空登臺未覺千金重崔郎愛畫復好奇  
向來得此信且疑為渠指點是真跡老我聰明非昔時  
圖窮忽見銀鈎筆復訝驪珠海中出江南偽本今已多  
入眼自須分甲乙世人得者惟見一至寶逢時故難匹  
從此高堂展玩頻明窻淨几無長日

題夏珪山水圖

江天雪暗江雲黑不辨溪南與溪北江風洶洶山水號  
怪石飛泉怒相射柴門不關草堂靜去馬來車兩無跡  
波濤瀕洞川氣昏亦有扁舟遠行客中流無帆撓不進  
船底差差浪花白歌蓬反舵苦不持雨笠風蓑半無力  
衝寒冒雪者何人咫尺相看不相識疑是山陰訪戴翁  
山裝水載何匆劇似聞軟語相慰藉豈有幽歡共愁寂  
問渠此去去何之却恐欲歸歸未得畫師本抱山林癖  
手製生絹開水墨橫揮直掃百態生不獨溪聲與山色

君看歲暮江湖裏如漱寒流枕高石對客披圖酒半醒  
空堂五月無炎赫

太原宋生灑手刻先君字法手稿贈之以詩時  
生已授廣平通判矣正德三年十二月三日

太原宋生得心畫點染毫端付金石寶賢堂

晉府

上古名

書一一親曾手翻刻秋闈累舉不一薦三入長安人未  
識喬卿篆刻初入室數紙西來搨新墨嗟予相字如相  
馬肯向驪黃辨顏色吾家府君妙楷法晉帖唐書飽探



索殘篇斷楮空塵埃生也見之三嘆息摹朱勒石不辭  
勞細入秋毫大盈尺炎天汗浹衣沾濕晚歲冰霜肉縐  
折當其腕指所至時意匠心師兩無跡長安俗工不解  
意僅有形模少風格逢生不早亦非遲猶及儒生頭半  
白須知絕代有名家兼為私門存手澤五百揚雄豈待  
年三千薦福空論直生今作倅當畿府方以文章為吏  
飾他日編成却寄渠書中定有長相憶

寄壽封君楊留耕先生

我着山頭雲氣濃錦官城上花枝紅地靈人傑應時出  
往歲吾識留耕翁一從獻策明光殿三世科名眼中見  
鸚鵡洲前驄馬歸鳳凰池裏麒麟現一品封高七袞稀  
烏紗玉帶明緋衣祇疑天上神仙是若比人間富貴非  
誰信今人不如古片玉一枝安足數蘇氏竒峯僅有二  
竇家芳樹纔稱五太史文章秘閣勳少年狀元才出羣  
眼看是父復是子此語吾傳揚子雲白頭憂國心尤切  
剛道成平好時節已見西川洗甲兵更依北斗瞻京闕

玄霜彩筆泥金箋為君興寄西南天願山不童花不老  
一歲一賦長生篇

題雙鳳圖為崔甥

梧桐枝上曛曩日共指丹山鳳凰出文采天教五色呈  
或赤如朱黑如漆族無大小皆稱長聲有雌雄同應律  
阿閣巢深養始成虞廷瑞見期難失池上竒毛信有鷁  
世間凡鳥空成匹極知耳目非常見聊假丹青為幻質  
點染真疑造化功品題合稱詩人筆聖朝有道萬物遂

郊有四靈何但一已看國士多羽翼復道郎君好家室  
為渠拂拭還愛惜飲以玉泉食竹實會須把酒對新圖  
坐我高堂聽鳴瑟

東坡煎茶圖

次坡韻

君不見玉川兩腋清風生又不見黃家竹几車聲鳴東  
坡別有煎茶法一勺解使千金輕江南雷鳴二月二已  
識山人采芳意東京貢院試一煎汴中那有中冷泉翰  
林老仙出西蜀醉掃蠻烟寫珠玉詩成吻渴腸亦饑長

鬚拂紙揚脩眉知公此興不獨樂蘇門六子長相隨請  
看畫策題詩手猶似當爐運筆時

墨梅一首

江邊老樹根如鐵枝上繁花亂成雪千葩萬蕊一時開  
剛值江南好風月川迴谷轉山路微春來無處無芳菲  
行遲似愛影在地坐久不知香滿衣江南此景看不足  
江北見之如見玉丹青紙上漫成塵桃李擔頭空過目  
平生知己孟與林招之不來勞我心看花載酒不知處

灞雪瀟瀟湖水深

題杜古狂畫壽張封君為禮部員外繼孟作

杜狂作畫如寫神朱顏皓髮真仙人持杯向空坐白石  
傲睨城市無風塵飛來素鶴如青鳥似報丹書下蓬島  
為言仙籍已通名却望雲端拜天表烏紗束帶宮錦裳  
始知身是尚書郎高門多客車馬集春宴隔城鐘漏長  
一從西陌移家住猶記城東買書處春官桃李足新陰  
暮景桑榆有佳趣仙耶官耶兩不知且看此畫復此詩

郎君再拜起謝客歲歲來共長生卮

題蟠桃園壽邵淑人為國賢侍郎作

春光如畫還如織枝上仙桃紅欲滴醉日醺風始釀成  
倚雲如露真消得度索山頭錦作堆玄都觀裏多蒼苔  
東方小兒強解事誰遣上樹偷三回司徒清鑒時爭羨  
天上人間兩曾見內殿初聞侍宴歸北堂再覩東風面  
種樹何如種德難物華人傑總稱賢願栽千本壽千歲  
不作尋常幻畫看

山水圖為魯司業題

山風肅肅溪水急溪上高亭暮來集空中落葉灑衣裳  
蒼苔滿地無人拾深山野客忽相過向來塵事何其多  
短言長語未終日回首白蘋生碧波

予莊詩

荆溪之莊誰所廬荆溪主人稱是予荆溪野人不識渠  
有眼道是延陵吳自言家世荆溪住宅相本出南州徐  
買田自釀北海酒引水欲活西江魚古來陵谷如翻手



俯仰應懷昔人有澗草巖花不計春過雲飛鳥猶回首自  
別茲莊二十秋四時風景一時收共看錦服明清晝莫遣  
青山笑黑頭莊哉莊哉不我負自我得之非外求君不  
見張公古洞空傳信蘇公獨山誰所命祇今那有張蘇  
家空餘往事令人嗟天壤之間孰非我莊以予名無不  
可萬間廣廈幾時成留取高名向江左

懷  
麓  
堂  
集  
卷  
五  
十  
三